

समे – 12:25 hrs.

<><><><><><>

Rajnath-Visit

रक्षा मंत्री राजनाथ सिंह हुंदा अज्ज किशतवाड़ दे चशौती ग्रांs जाने दा कार्यक्रम ऐ जित्थे ओह पिच्छले दिनें बद्दल फटने दी कुदरती क्रोपी दे बाद चलाए जा'रदे तुपाई ते राहत अभियान दी समीक्षा करडन। बद्दल फटने दी कुदरती क्रोपी करी चशौती च केई लोकें दी मौत होई गई ही ते केई अजें बी लापता न। लेफ्टिनेंट गवर्नर मनोज सिन्हा होरें अज्ज जम्मू दे गौरमेंट मेडिकल कॉलेज अस्पताल च मीडिया कर्मिं कन्नै गल्ल करदे होई रक्षा मंत्री हुंदे प्रस्तावित दौरे बारै जानकारी सांझी कीती। उ'नें दस्सेआ कि जेगर मौसम ठीक रौहग तां रक्षा मंत्री होर पैहले जम्मू औडन ते फही इत्थुआं ओह चशौती ग्रांs लेई रवाना होडन। अपने दौरे दुरान राजनाथ सिंह होर जमीनी हालात दा जायजा लैने दे कन्नो-कन्नी राहत सरबन्धी जतनें दी समीक्षा करडन ते कुदरती क्रोपी दी मारें हेठ आए दे परोआरें कन्नै बी गल्लबात करडन।

<><><><><><>

LG-GMC Visit

लेफ्टिनेंट गवर्नर मनोज सिन्हा होरें अज्ज जम्मू दे गौरमेंट मेडिकल कॉलेज अस्पताल जाइयै किशतवाड़ दे चशौती ग्रां च बद्दल फटने दी कुदरती क्रोपी च जख्मीं होए दे लोकें कन्नै मलाटी कीती। इस मौके मीडिया कन्नै गल्लबात करदे होई श्री सिन्हा होरें दस्सेआ जे चशौती थमां आहन्ने गेदे 16 जखिमएं दा ऐल्लै जीएमसी जम्मू च इलाज चलै करदा ऐ ते सब्भनें दी हालत

स्थिर ऐ। उ'नें आखेआ जे राहत ते आबादकारी सरबंधी हीलें गी तेज रफतार कन्नै तोढ़ चाढ़ेआ जा'रदा ऐ ते सरकार प्रभावत परोआरें दी मदाद लेई हर संभव जतन करै करदी ऐ। उ'नें दस्सेआ जे तकरीबन 32 लोक अजें बी लापता न। एलजी होरें प्रभावत लोकें गी हर मुमकन मदाद दा भरोसा दोआया ऐ।

<><><><><><>

CM-Alert

जम्मू-कश्मीर च जारी भारी बरखा दे मददेनज़र मुखमन्त्री ओमर अब्दुल्ला होरें सब्भनें सरबन्धत मैहकमें गी निर्देश दिते न जे ओह हाई अलर्ट पर रौहन। ध्यानजोग ऐ जे संभाग दे बक्ख-बक्ख हिस्सें च जंदी रातीं थमां होआ करदी भारी बरखा करी केईं इलाकें च पानी भरोची गेदा ऐ ते नदी-नाले खतरे दे निशान कोला उप्पर बगा करदे न। सरकारै, सरबन्धत नियंत्रण कक्षें गी सक्रिय करी दिते दा ऐ ते मुखमन्त्री हुं'दे दफ्तरै, सब्भनें मैहकमें कन्नै लगातार राबता बनाए दा ऐ। रिहायशी इलाकें च जमा होए दे पानी गी कड्डने ते बिजली ते पानी ज्नेही अत्त लाज़मी सेवाएं दी ब्हाली बक्खी चेचा ध्यान दित्ता जा'रदा ऐ।

<><><><><><>

Heavy-Rainfall

जम्मू खिते च जंदी रातीं थमां होआ करदी भारी बरखा करी केईं इलाकें च हाड़ ज्नेह हालात पैदा होई गेदे न। भारी बरखा करी रिहायशी इलाकें च पानी किट्ठा होने करी सिड़कें ते घरें-मकानें गी बी नुकसान पुज्जा ऐ। भारी बरखा ते हाड़ करी जम्मू-पठानकोट जरनैली सिड़कै पर

सहर खड्ड उप्पर बनाए गेदे पुल गी नुकसान पुज्जा ऐ। मौसम विभाग नै अगले 24एं घैंटे दरान जम्मू, डोडा, किश्तवाड़, पुंछ, रजौरी, रामबन, रियासी, सांबा, उधमपुर, अनंतनाग ते कुलगाम च बड़ी भारी बरखा दी पेशगोई कीती दी ऐ। सरबंधत अधिकारिएं प्रदेश च ते खासकरियै जम्मू संभाग च केई सारी थाहें पर बद्दल फटने, चानचक्क हाड़ औने ते ल्हास-पस्सियां पौने दी शैंका बी जाहिर कीती ऐ। मौसम विभाग नै कल्लै तोहड़ी इयै नेह हालात बने दे रौहने बारै सोहगा सतर्क करदे होई बसनीकें गी सलाह दिती ऐ जे ओह अपनी सुरक्षा जकीनी बनाने लेई सब्भै लोड़चदी एहतियातां बरतन ते बेवजह सफर कोला बी परहेज करन।

<><><><><><>

UNICEF-JK Court

जम्मू-कश्मीर हाईकोर्ट दी किशोर न्यास समिति नै यूनीसेफ इंडिया दे सैहयोग कन्नै 'बच्चिएं दी सुरक्षा' जकीनी बनाने सरबन्धी विशे पर अपने सरबन्धत धड़ें कन्नै सलाह-सुतर आहले सलाना कार्यक्रम दा कल ज्यूडीशियल अकैडमी श्रीनगर च आयोजन कीता। जम्मू-कश्मीर हाईकोर्ट दे मुख न्यासधीश जस्टिस अरूण पाल्ली होरें इस कार्यक्रम दा उद्घाटन कीता ते कुड़िएं गी बाअखितयार बनाने लेई समाज च सकारात्मक बदलावें दी जरूरतै पर जोर पाया। जस्टिस सिंधु शर्मा होरें बी इस मौके पर बचार सांझे कीते। इससै चाल्ली होरनें वक्ताएं समाज च कुड़िएं कन्नै होने आहली फर्कोफर्की सने उं'दी शिक्षा च औने आहली रूकावटें गी दूर करने दी जरूरतै पर जोर पाया। यूनीसेफ इंडिया थमां बच्चें दे अधिकारें दी राक्खी-हिफाजत सरबन्धी

माहिर विजय लक्ष्मी अरोड़ा होरें बच्चें दे बयाहें दी दर च आई दी कमी ते लिंग अनुपात च दर्ज कीते गेदे सुधार बारै गल्ल कीती।

<><><><><><>

LG-Deligations

केई सारे डेलीगेशनं कल श्रीनगर च लेफ्टिनेंट गवर्नर मनोज सिन्हा हुंदे नै मलाटी करियै उ'नेंगी जम्मू-कश्मीर च नमिएं काहडें ते ग्रामीण विकास गी बढ़ावा देने लेई रम्भी गेदी बड्डी पैहलकदमी बारै जानकारी दिती। जेएंडके डेयरी फारमर्स एसोसिएशन ते स्कास्ट कश्मीर दे शैक्षणिक अमले आहले इक सांझे डेलीगेशनै, संदीप सिंह चिब हुंदी अगुवाई च एलजी हुंदे नै मलाटी कीती ते उ'नेंगी औने आहले दिनें च आयोजित कीते जाने आहले पशु धन मेले बारै अवगत करोआया जेहदा मकसद प्रदेश च डेयरी फार्मिंग ते माल-बच्छे मतल्लक नमिएं काहडें गी बढ़ावा देना ऐ। तोआई 75 स्टूडेंट्स सैटेलाईट्स मिशन दे प्रोजेक्ट डिरैक्टर डाक्टर के. गोपालाकृष्णन होर बी एलजी हुंदे नै मिले ते उ'नेंगी इसरो दे मार्गदर्शन हेठ 'कश्मीर सैटेलाईट' विकसित करने लेई आई.यू.एस.टी. अवंतीपोरा च इक सैटेलाईट इन्क्यूबेटर सेंटर खडेरने बारै जानकारी दिती। एलजी होरें इ'नें दौनें पैहलकदमिएं दी सराहना करदे होई इ'नेंगी युवा सशक्तिकरण ते आत्मनिर्भरता दी दिशा च महत्वपूर्ण गैह करार दिता।

<><><><><><>

PTC Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 ब'रें दे

बशकार ऐ ते ओह जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोइचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंध्यत लोइचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोइचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 31 अगस्त 2025 संज 6 बजे कोला पैहले- पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>